


Contos e entradas

Ambrose Bierce



Contos e entradas

traducite in interlingua per Onofrio Notarstefano, Italia.
Transcription: Onofrio Notarstefano. Composition:
Thomas Breinstrup. Revision: Bent Andersen e Arne Peder-
sen. Publicate: decembre 2006
© 2006 Union Mundial pro Interlingua

Tote derechos reservate. Iste texto es facite disponibile pro uso non-commercial solmente. Tote formas de re-vendita o re-distribution electronic o imprimite es prohibite sin permission in scripto. Nulle parte de iste publication pote assi esser reproducite, copiate, conservate in un systema de cercar o transmittite in ulle forma o per ulle methodo: graphic, electronic, mechanic, photographic, registrate sur disco o cassetta, transferite a bases de datos o in altere maniera sin permission in scripto. Es permitite citar in recensioni con indication del fonte.

***Bibliotheca electronic* in interlingua**

www.interlingua.com

Le Bibliotheca electronic in interlingua es un collection de eLibros, redigite e publicate per le Union Mundial pro Interlingua (UMI), www.interlingua.com

Ambrose Bierce

Scriptor, viagiator, jornalista, Ambrose Bierce (1842-1914) es un insolite figura del litteratura american. Ille esseva un optime jornalista: su reportages super le guerra civil con un stilo sic evidentia le horror e le absurditate del guerra.

Bierce scribeva centenas de contos inspire per un humorismo crude, feroce e a vices macabre, ille es cognite anque per su “Dictionario del diablo”. Satiric, paradoxal, venate de anarchia, le Dictionario demystifica le “entratas” del language official.

Bierce es un personage “sulfuree”, un autor maledicte, e a iste fama contribueva su disparition, in circumstantias mysteriose, in Mexico revolutionari del tempores de Zapata e de Villa. On presenta ci alicun curte contos de Bierce e un parve numero de entratas de su Dictionario del diablo.

Contos

LE OPOSSUM DEL FUTURO

Un die un Opossum que dormiva appendite per le cauda al plus alte ramo de un arbore, se eveliava e videva un grosse Serpente inrolate inter ille e le trunco del arbore.

“Si io continua reger me”, ille diceva a se mesme, “io essera devorate; si io me lassa cader, me rumpera le collo.”

Pois ille improvise decideva simular.

“Mi perfecte amico”, ille diceva, “mi instincto parental recognosce te como le plus nobile e eloquente demonstration del theoria del evolution. Tu es le Opossum del Futuro, le ultime e plus perfectemente adaptate exemplar de nostre specie, le matur resultado del absolute prensilitate: tu es integremente cauda!”

Totevia le Serpente, que esseva orgoliose de su antique frequentation del Sacre Scriptura, esseva un creationista rigorse, e non acceptava le opinion del scientia.

LE MALFACTOR INSATISFACTE

Un Judice habeva pronunciate su sententia e procedeva a illustrar al Malfactor le inconvenientes del crimine e le advantages de un bon conducta.

“Senior Judice”, diceva le Malfactor interrumpente le discurso, “volerea tu ben esser assi gentil de commutar mi pena a dece annos de galera, sin altere adjunctiones?”

“E proque?” diceva le Judice stupefacte, “io te ha date solo tres annos!”

“Si, io lo sape”, nutava le Malfactor “tres annos de prision e le predica. Io volerea commutar le predica.”

LE UMBRA DEL LEADER

5

Un Leader Politic promenava in un belle jornada de sol, quando ille videva su Umbra eclipsar se.

“Retorna ci, delinquente”, ille critava.

“Si io esseva un delinquente”, le respondeva le Umbra, augmentante le velocitate, “io non te haberea unquam abandonate.”

LE CALIFORNIANO RETORNATE

Un Homine esseva pendite e moriva. Esseva le anno 1893.

“De ubi veni tu?” le demandava Sancte Petro quando le Homine se presentava al porta del Celo.

“De California”, respondeva le postulante.

“Entra, filio mie; tu porta novas gaudiose.”

Quando le Homine dispareva in le interior, Sancte Petro prendeva le registro e annotava lo que seque:

“Dece-sex de februario 1893. California conquirite per le christianos.”

UN AMBITION DISMENSURATE

Le Presidente de un grande *Corporation* entrava in un boteca de stoffas e legeva un folio publicitari que diceva:

“SI VOS NON TROVA LO QUE VOS DESIRA
PETE LO.”

Se approachava le proprietario, qui le habeva attentemente observate dum ille legeva le folio, e le homine se apprestava a peter quando le proprietario le anticipava clamante un commisso:

“John, monstra a iste senior le Terra.”

AL POLO

Post un grande dispendio de medios e vitas human, un Hardite Explorator succedeva a attinger le Polo Nord, ubi ille esseva abordate per un Galeut Native qui viveva illac.

“Bon die”, diceva le Nativo; “Io es felicissime de vider vos, ma proque vos ha venite ci?”

“Le gloria”, diceva le Hardite Explorator, laconicamente.

“Si, si, io comprende”, insisteva le altere; “ma vostre discoperta, qual advantages da illo al homines? Qual veritates revela illo, que antea esseva inaccessible? Io parla re factos que ha un valor scientific.”

“Que Deo me fulmina! Io non ha le minime idea de illo”, respondeva francamente le grande homine; “vos deberea demandar al Scientistas del Expedition.”

Ma le Scientistas del Expedition diceva que illes habeva essite si absorbite per le cura de lor instrumentos e per le examine de lor cartas que illes non habeva habite tempore a pensar a illo.

UN REQUESTA IMPERFECTE

Un Judice Membro del Corte Supreme esseva sedite sur le ripa de un fluvio quando un Viagiator se approximava e diceva:

“Io volerea transversar. Es il legitime usar iste barca?”

“Si”, esseva le responsa; “es mi barca.”

Le Viagiator le regratiava e, pulsate le barca in aqua, montava super illo e partiva remante. Ma le barca se affundava e ille se necava.

“Homine sin corde!”, diceva un Spectator Indignate.

“Proque tu non le ha dicite que tu barca habeva un foramine?”

“Le question del conditiones del barca”, diceva le grande jurista, “non me ha essite submitte.”

DUO FILIOS

Un Homine habeva Duo Filios. Le major esseva virtuose e obediente, le plus juvene prave e astute.

Le patre, super le puncto de morir, diceva al Filios: “Io ha solo duo cosas de valor: mi grege de camelos e mi benediction. Como debe io distribuer los?”

“Da me”, diceva le Filio Minor, “tu benediction, quia illo potera corrigere me. Io es secur que io venderea le camelos e dilapidarea le moneta.”

Le Filio Major, celante su gaudio, diceva que ille probarea contentar se del camelos e de un mente pie.

Assi il esseva decidite e le Homine moriva. Pois le prave Filio Minor iva al Cadi e diceva: “Mi fratre me ha defraudate de mi legitime hereditage. Ille es assi prave que nostre patre, como on sape, le negava su benediction; como es il possibile que ille le ha date le camelos?”

Assi le Filio Major esseva constringite a renunciar al grege e esseva bastonate pro su rapacitate.

LE LIMITE

9

Le Rege del Insulas Remote nominava prime ministro su cavallo e cavalcava un homine. Notante que sub le nove regulas le regno prosperava, un Vetule Statista suggereva al Rege ir a pasturar sur le herba e mitter in su loco super le throno un bove.

“No”, respondeva le sovrano meditante, “un bon principio risca devenir un excesso nocive. Le ver reformas sape arrestar se a un passo ab le revolution.”

LE CAVALLO SALVAGE E LE CAVALLO DOMESTICATE

Un Cavallo salvage incontrava un Cavallo domesticate e cominciava reprochar lo pro su condition de servitude. Le bestia domate replicava affirmante esser libere como le vento.

“E allora”, diceva le altere, “explica me a que cosa servi le instrumento que tu ha in bucca.”

“Es ferro”, esseva le responsa, “un tonificante multo efficace.”

“Si, ma qual es le uso del bridas appendite al ferro?”

“Illos servi a impedir que le ferro cade del bucca.”

“E que me dice tu re le sella?”

“Illo me sparnia multe fatiga: quando io es lasse io monta super illo e va a cavallo.”

LE PORCO MAESTRATE

Un Mago habeva un Porco Maestrate que viveva civilmente, decorosamente, como un gentilhomine, ganiante se un grande fama e conquirante se le benevolentia de totes con su nobile iniciativas. Totevia le Mago notava que su creatura esseva infelice e transformava le Porco in Homine. Subito isto abandonava su lecturas, le horologio, le amate instrumentos musical e le altere affaires de su profession e se immergeva in un fossato de fango, lassante foras solo le puncta del naso e grunniente con profunde satisfaction.

CATTA E JUVENE

Un Catta se inamorava de un belle Juvene e implorava Venus de transformar la in un femina.

11

“Un assi futile cambiamento”, diceva Venus, “tu mesme poterea ben facer lo, sin disturbar me. Comocunque: sia tu un femina.”

Depost, volente verificar le successo del transformation, Venus inviava un mus; le Femina comenciava critar e se comportava assi tragicamente que le Juvene non voleva plus sposar la.

AGRICULTOR E FILIOS

Un Agricultor qui esseva super le puncto de morir, sapente que durante su maladia su Filios habeva lassate que le vinia se plenava de mal herbas pro jocar al cartas con le doctor, diceva a illes:

“Filios mie, in le vinia ha essite sepelite un grande thesauro. Que vos excava usque vos lo trovava.”

Assi le Filios excavava usque a extirpar tote le mal herbas, e tote le vites, e oblidava anque sepelir le vetulo.

LE SALVAMENTO

Un vetere femina celibe, qui stava vicin a un fluvio, ubi esseva anque un Moderne Cortesator, esseva audite pronunciar iste parolas: “Nobile dispensator! Le vita que tu salvara es tue!”

Illa repeteva le phrase multe vices con diverse intonationes, de post saltava in le aqua, ubi illa moriva necate.

“Io es un Nobile Dispensator”, diceva le Moderne Cortesator, vadente via pensative; “le vita que io ha salvate es in realitate le mie.”

POLITICOS E BUTINO

Alicun entitates politic se divideva le cargas. “Io administrara le carceres”, diceva le Respecto del Opinion Public, “e facera cambiamentos radical.”

“Io”, diceva le Mal Reputation “continuara a occupar me del affaires public, dum mi amico presente, le Balancia Fraudulente, mantenera le governmento del poter judicial.”

Le Caldieron Politic diceva que ille haberea ancora bullite nihil, si ille non habeva essite plenate del Pejor Fece.

Le Poter Cohesive del Division del Cargas observava tranquillemente que le chefes del partitos le pertineva.

“Il me displace”, diceva le Infime Nivello de Degradation, “illes es jam le mies.”

13

LE SANCTE DIACONO

Un Predicator Itinerante qui habeva multo laborate in le vinia moral, susurrava al aure del Sancte Diacono del Parochia:

“Fratre, iste gente te cognosce, e tu supporto active portara abundante fructo. Io te preca, pete donationes pro me, e un quarto essera tue.”

Assi faceva le Sancte Diacono, e intascate le moneta, attendeva que le parochianos iva via, pois augurava le bon nocte.

“Le moneta, fratre, le moneta del collecta!” diceva le Predicator Itinerante.

“Infelicemente nihil te pertine”, esseva le responsa; “le Grande Adversario ha indurate lor cordes, e un quarto es toto que illes ha potite dar.”

LE FUSILES DE LIGNO

Un Regimento de Artilleria del Militia de Stato peteva al Governator fusiles de ligno con le quales facer exercitationes.

“Illo costara minus”, illes explicava “que le ver fusiles.”

“Ma io non vole sacrificar le efficientia al sparnio”, diceva le Governator. “Vos habera fusiles ver.”

“Gratias, gratias”, critava le guerreros expansivamente. “Nos prendera cura de illos, e in caso de guerra los conservara in le arsenal.”

LE DESTINO DEL POETA

Un subjecto camminava super le strata principal, ben fornite de meditationes e sin omne altere cosa, quando ille se trovava improvemente al portas de un Grande Citate. Dum le subjecto peteva entrar, ille esseva arrestate quia Improprie Sollicitator de Ordinantias e portate ante le Rege.

“Qui tu es”, diceva le Rege “e qual es tu mestiero?”

“Io es Coardo Beccofin”, respondeva le subjecto con fulminee inventiva, “pickpocket de profession.”

Le Rege voleva liberar le subjecto ma le Prime Ministro suggereva examinar le digitos del manos del prisionero. Illos esseva applattate e callose super le punctas.

“Alora!” critava le Rege. “Lo diceva io! Ille ha le vitio de contar syllabas. Ille es un poeta. Conduce le al Grande Dissuasor del Habitude de Portar un Capite.”

“Mi soverano”, diceva le Magistrato Incargate del Ingeniose Condemnationes, “io suggere un punction plus cruel.”

“Qual?” demandava le Rege.

“Lassa le su capite.”

E isto esseva executate.

PRINCIPIO MORAL E INTERESSE MATERIAL

Un Principio Moral incontrava un Interesse Material super un ponte stricte. Illes non poteva passar insimul.

“A terra, vulgar nullitate!” tonava le Principio Moral, “lassa me passar supra te!”

Le Interesse Material se limitava a reguardar le in le oculos, dicente nihil.

“Beh”, diceva le Principio Moral, hesitante, “que nos tira al sorte pro decider le precedentia.”

Le Interesse Material manteneva un profunde silentio e le reguardava fixemente.

“Pro evitar un conflictio”, diceva le Principio Moral con un certe disgusto, “io me placiara sur le dorso e te facera passar supra me.”

Alora le Interesse Material usava le lingua. “Io non crede que tu es un bon tapete”, ille diceva. “Io non ama camminar super le prime cosa que mi pedes incontra. Il es melior que tu te jecta in aqua.”

E il eveniva justo isto.

LE CANDELA CARMESIN

Un Homine sur le puncto de morir diceva a su sposa: “Io va lassar te pro sempre; assi da me un ultime proba de tu affecto e de tu fidelitate. In mi scriptorio tu trovava un candela carmesin, que ha essite benedicite per le Summe Sacerdote e que ha un particular significato mystic. Jura me que si longemente que existera le candela tu non te resposara.”

Le Femina jurava e le Homine moriva.

Al funerales le Femina remaneva presso le feretro, con un candela carmesin accendite in mano, usque illo esseva integremente consumite.

AGENTE E SCALERATO

17

Un Chef del Policia, indignant quia ille habeva vidite un Agente bastonar un Scelerato, le diceva: “Si tu lo facera de nove io te expellera del policia.”

“Non sia assi sever con me”, diceva le Agente surridente, “io le percuteva con un baston borrhate.”

“Tamen”, insisteva le Chef del Policia, “tu ha committite un acto reprochabile, anque si inoffensive. Io te ordina de non refacer lo”.

“Ma”, diceva le Agente sempre surridente, “ille esseva un Scelerato borrate.” Cercante de exprimer tote su gratification le Chef del Policia lanceava le mano dextere assi violentemente que le pelle se rumpeva sur le axilla e un fluvio de pulvere de serration exiva del ferita. Ille esseva un Chef del Policia borrate.

LE CRITICOS

Dum ille faceva le banio, Antinous esseva vidite per Minerva qui se innamorava tosto per le beltate del juvene e, completamente armate como illa esseva, le Dea descendeva del Olympo pro seducer le; ma inattentamente monstrante le scuto con le capite de Medusa, illa habeva le disgratia de vider le belle mortal transformar se in petra post haber le regardate solo un instante. Tosto le Dea volava a Jove pro peter de dar nove vita al juvene; ma, ante que isto poteva evenir, passava un Sculptor e un Critico e le examinava.

“Illo me sembla un pessime Apollon”, diceva le Sculptor, “le torso es troppo stricte, e un brachio es medie pollice plus curte que le altere. Le posa es innatural, io dicerea impossibile. Ah, amico mie, tu deberea vider mi statua de Antinous.”

“Io judica”, diceva le Critico, “le figura passabile, anque si de gusto Etrusc, ma le expression del visage es decise-mente Toscan, e, assi, false in comparison con le natura. A proposito de isto, ha tu legite mi labor re *Le fallacia aspectual in le arte?*”

ZELO EXCESSIVE

Un tigre que mangiava homines devastava le Regno de Damnasia, quando le Rege, multo preoccupate del vitas del personas, promitteva facer sposar su filia Zodroura al cora-giose qui haberea occidite le bestia. Qualque dies depost se presentava Camaraladdin petente obtener le remuneration.

“E ubi es le tigre?”

“Que pote le asinos cantar super le tumba de mi oncle”, respondeva Camaraladdin, “si io osa approximar me lo un kilometro!”

“Scelerato!” critava le Rege, disvainante su Consolator-Del-Dolor, “como osa tu peter mi filia sin haber facite ulle cosa pro ganiar la?”

“Tu es plus sage, mi Rege, que Soliman le Grande, e tu servo non es que pulvere del tumba de tu can, ma tu erra. Il es ver, io non ha occidite le tigre, ma attende! Io te ha porta-

te le scalp de un homine qui habeva accumulate cinque milliones de pecias de auro.”

Le Rege disvainava le Consolator-Del-Dolor e facente volar via le capite de Camaraladdin diceva:

“Apprende, coardo, le inopportunitate del excessive zelo. Si le millionario habeva essite lassate sol, haberea devorate ille le tigre”.

LE STATUA DE BUMBOOGLE

Super un alte collina supra le antique citate de Bumboogle se trovava un statua colossal, erigite per le habitantes pro celebrar le memoria del illustre Gaakawolwol, “le melior e le plus sage inter le homines”. Un Viagiator proveniente ab le antipodes demandava al Custode del Statua (le plus desirate carga del regno): “Le ventos marin, o Multo Exaltate, non ha portate le fama de tu grande compatriota a lamber le ripas de mi pais de origine. Que cosa faceva ille, tanto grande?”

“Nihil de nihil: pro isto nos sape que ille esseva bon.”

“Ma, su sagessa... que cosa diceva ille?”

“Ille non diceva unquam ulle cosa; pro isto nos sape que ille esseva sage.”

LE BUMBO DI JIAM

Le Pahdour de Patagascar, e le Gookul de Madagonia disputava un insula a que ambes diceva esser le proprietario. Finalmente, post un suggestion del Liga del Funditores de Cannones (que habeva representantes importante in le duo pais), illes decideva confider in le juicio del Bumbo de Jiam. Accordante se super le preliminares del arbitrage, totevia, le duo trovava nove motivos de conflicto e faceva recurso al armas. Post un guerra longe e disastrose, quando le duo partes esseva in ruina, le Bumbo de Jiam interveniva in le interesse del pace.

“Mi grande e bon amicos”, ille diceva al fratres soveranos, “il essera utile a vos apprender que il ha problemas plus complexe e plen de imprevisites que alteres, e que presenta un grande numero de punctos sur le quales il es possibile dissentir. Quatro generationes de vostre regal predecessores ha disputate re le possession de iste insula sin resolver lo. Face attention, oh, face attention al periculos del arbitrage international! E il es contra iste periculos que io ha le deber de proteger vos a partir de ora.”

Dicite isto, ille se appropriava le duo pais e post un longe e felice regno esseva invenenate per su Prime Ministro.

LE MEDICO PIETOSE

Un Medico de Bon Corde, sedite apud un patiente affligite per un mal dolorose e incurabile, audiva detra se un ruito e, volvite se, videva un Catto que rideva sarcasticamente e un Mus vulnerate que tentava inutilmente de escappar del camera.

“Mal bestia cruell!” ille critava. “Proque tu non lo occide?”

Ille se altiava, allontanava le Catto, usante su pedes, e poneva fin al suffrentias del Mus distachante su capite. Depost le Medico de Bon Corde retornava al malado, qui se lamentava, le dava un stimulante, un tonico e un reconstituente e iva via.

DUO DAMNATOS

Duo Creaturas Ruinate, turbate, lacrimose e detestabile, se incontrava in un landa desolate sub le luce de un luna spectral.

“Io te augura bon Natal”, diceva le Prime Creatura Ruinate, con un voce que semblava le canto de un tumba.

“E a te bon Anno Nove”, respondeva la Secunde Crea-

tura Cecate, con le tono de un accordion penitente.

Pois illes cadeva le un in le brachios del altere e plorava calide lacrimas super le respective spinas dorsal lamentante lor exilio del Regno del Ineffabile Nonsense. Quia un del creaturas maledicte esseva le Prime de Januario, e le altere le Vinti-cinque de Decembre.

VIDUA E SOLDATO

Un Femina cuje marito habeva essite pendite veliava al cadavere e implorava plorante le Sentinella de guarda:

“Lassa me portar lo via.”

“Seniora”, diceva le Sentinella, “io non pote plus resister a vostre supplicas; vostre beltate vince mi senso del deber. Io dara a vos le corpore e prendera su loco in le prision, ubi un colpo de mi pugnol me dara le joia de morir pro un creatura assi gratiose.”

“No”, diceva le seniora, “io non pote consentir le sacrificio de un vita tanto nobile. Si vos vermente me riguarda con favor, que vos adjuta me e mi servitores a portar le sacre objecto de mi regret in mi castello, ubi vos restara celate usque quando nos fugira del pais.”

“No”, diceva le Sentinella, “io esserea securmente disco-

perite e avellite ab vostre brachios. In tres dies vos potera reclamar le corpore de vostre car marito; pois vos accordara a un honeste soldato le felicitate e le importantia que su devotion merita.”

“Tres dies!” exclamava le seniora. “Il es troppo pro attender e pauco pro le fuga. Sin incombramento nos pote attinger plus facilmente le frontiera. Le sol va jam surger: que nos lassa le corpore e parti.”

DUO SCEPTICOS

Alicun paganos cuje Idolo esseva multo deteriorate per le intemperie lo jectava in un fluvio. Illes construeva un Nove Idolo e initiava un public adoration a su pedes.

“Que eveni?” demandava le Nove Idolo. “Patre del Joia e del Sanguine”, diceva le Grande Sacerdote, “sia patiente e io te inseniara le doctrinas e le ritos de tu sacre religion.”

Passava un anno, e al fin del curso de studios de theologia, le Idolo peteva de esser jectate in le fluvio, declarante se atheo.

“Non te preoccupar”, diceva le Grande Sacerdote “anque io es atheo.”

**ALICUN ENTRATAS DEL
“DICTIONARIO DEL DIABOLO”**

Admiral: Parte del nave de guerra que ha le carga de parlar: le carga de pensar es del figura de proa.

Aere: Substantia nutritive fornite per un munificente Providentia pro ingrassiar le povres.

Aratro: Instrumento que invoca manos accostumate a usar le penna.

Asino: Cantator con belle voce ma sin aure. Le asino es un animal amplemente e variemente celebrate in le litteratura, in le arte e in le religion de tote le tempores e pais: necun bestia attrahe e accende le human imagination quanto iste nobile vertebrato. Tote lo que ha essite scribite super le asino constitue un bibliotheca splendide e grandiose, que pote competer con le bibliotheca super Shakespeare o super le Biblia. Ergo, on pote dicer que tote le litteratura es plus o minus asinin.

Assecurantia: Moderne ingeniose joco de hasardo: le jocator pote cultivar le agradabile convincimento de facer saltar

le banca.

Association: Le union de multe personas in un organismo fictive denominate societate, in anglese *corporation*, pro render le personas irresponsabile de lor actiones. A, B e C forma un societate: A rapina, B roba, C (in le societate il debe esser absolutamente un gentilhomine) frauda. Illo es un interpresa dedicate al saccheamento, al furto, al fraude. Ma le tres socios, qui ha conjunctemente decidite e individualmente actuate le malfactos del firma non pote esser mittite in stato de accusation. Il es injuste citar lor nomines quando on censura lor actos complite socialmente: juste in vice facer lo quando le actos es laudabile. Un corporation es como le anello de Gyges, que da le invisibilitate, cosa multo commode pro le fures. Le sclerato qui inventava le *corporation* ha morite, se ha “*discorporate*”.

Benefactor: Persona que face grande acquisition de ingratitude, sin totevia influer super le precio, que es a portata de totes.

Biographia: Tributo litterari que un mediocre paga a un grande.

Calumniar: Attribuer a altere, con malitia, mal actiones que nos non ha habite le tentation o le opportunitate de committer.

Canon: Instrumento usate pro le rectification del confinnos national.

Circo: Loco ubi cavallos, leones e elephantes ha le possibilitate de vider homines, feminas e infantes facer le paleassos.

Confidente: Persona al qual A revela le secretos de B, que le ha essite revelate per C.

Corsario: Politico del mares.

Demam: Die del bon actiones, de repententia e de vita nove. Initio del felicitate.

Denigrar: Parlar de qualcuno, dicente como vos le vide, quando ille non pote vider vos.

Descendentia: Descendita verso le basso. Termino popular pro dicer que le actual generation occupa un grado inferior in comparation con le precedente. Assi ha ration Darwin

qui parla, in le melancholic libro “The Descent of Man”, re le superioritate del babuino.

Diplomatia: Arte patriotic, que consiste in mentir pro proprie pais.

Divorcio: Sono de trompa que separa le contententes e les face combatter a distantia.

Eccentricitate: Modo facile pro distinguer se. Le imbecilles recurre a illo pro exaltar proprie ineptitude.

Ecclesia: Loco ubi le pastor adora Deo e le feminas adora le pastor.

Egoista: Qui es sin consideration pro le egoismo de alteres.

Eloquentia: Arte de convincer le stupides. Solitamente illo es representate como un parve homine calve qui gesticula con un vitro de aqua avante.

Epitaphio: Inscription tumbal que recorda al defuncto cosas que haberea essite possibile a ille si ille habeva habite voluntate e opportunitate.

Equal: Mal como un altere cosa.

Equalitari: Politico o reformato social plus interessate a abassar le alteres al proprie nivello que a altiar se mesme al nivello de alteres.

Equalitate: In politica, condition imaginari in le qual on conta le cranios e non le cerebros, le merito es determinate per le sorte e punite con promotiones. Le logic conclusion de iste principio, es que illo require rotation in le officios e in le penitentiarios. Tote le homines habente le mesme directo al voto, ha le mesme directo a un carga e es equalmente subjecte a condemnation.

Error: Mi culpa, differente de vostre culpas, que es crimi-

29

Erudition: Pulvere succutite ab un libro que cade in un cranio vacue.

Evangelista: Portator de bon novas, specialmente (in senso religiose) del nova que garanti a nos nostre salvation e le damnation de nostre proximo.

Fabula: Parve mentita pro illustrar un importante veritate.

Financia: Arte o scientia del administration del rentas e ressources de alteres pro le maxime beneficio del gestor.

Fraudar: Garantir al populo soveran que, si vos essera eligite, vos non robara.

Fraude: Vita del commercio, anima del religion, esca del seduction, base del poter politic.

Guerra: Subproducto del artes de pace.

Historia: Reporto quasi completamente false de eventos quasi completamente irrelevante provocate per governantes quasi completamente scelerate e per soldatos quasi completamente imbecille.

Idolatra: Qui professa un religion in le qual nos non crede e cuje symbolos es differente del symbolos del nostre. Qui, anque, se preoccupa plus de un imagine super un pedestallo que de un imagine super un moneta.

Impietate: Irreverentia de alteres in relation con nostre

divinitate.

Judice: Persona qui se intromitte sempre in disputas in le quales ille non ha un interesse personal. Functionario cuje attributiones - como ha recentemente demonstrate a un gruppo de studentes de directo un grande luminar in le campo de jurisprudencia - es multo simile a cellos de Deo.

Juratos: Gruppo de personas incargate per un tribunal de assister advocatos e judices in le effortio de impedir al lege de degenerar in justitia.

Libertate: Un del plus preciose proprietates del imagination.

Longevitate: Immoderate prolongamento del pavor del morte.

31

Malfactor: Le factor principal del evolution del racia human.

Malthusian: Relative a Malthus e a su theorias. Malthus credeva que se poteva limitar artificialmente le crescita del population, ma, in fin, ille comprendeva que con le parolas

le limitation non esseva possibile. Inter le sequaces del scientista, qui mitteva plus efficacemente in practica le doctrina malthusian, il habeva Herode, rege del Judea. Il es necessari dicer totevia que tote le leaders famose pertineva al mesme schola de pensata.

Manna: Nutrimento miracolosamente fornite al Israelitas in le deserto. Quando illes non lo recipeva plus, illes se stabiliva in le area e comenciava cultivar le terra, fertilisante lo regularmente con le cadaveres del indigenas.

Marcha: In le aventuras de un armea, illo es le fluxo que se move attrahite per le butino.

Masoneria: Ordine characterisate per ritos secrete, ridicule ceremonias e extravagante vestimentos. Illo nasceva durante le regno de Carolo II, in le ambiente del artisanos londonese, ma a illo esseva successivamente aggregate le mortos del seculos passate, sempre plus retro, usque a includer tote le generationes human ab Adam e a incrementar se con selectionate representantes del population ante le creation del Chaos e del Informe Vacuo. De vice in vice fundatores del ordine esseva Carolo Magne, Cesare, Salomon, Zoroastre, Confucio, Thoth, Buddha. Su emblemata e symbolos ha

essite trovate in le catacombas de Paris e Roma, super le marmores del Parthenon e super le Grande Muralia de China, inter le templos de Karnak e de Palmira, in le pyramids egyptie, e a trovar los ha sempre essite un mason.

Nepotismo: Dar un carga a proprie granmatre pro le ben del partito.

Oblivion: Dono de Deo al debitores, pro compensar les de haber les private del conscientia.

Occidente: Le parte del mundo al west (o al est) del Oriente. Illo es in grande majoritate habitate per le Christianos, potente sub-tribo del Hypocritas, cuje principal activitates es le assassinamento e le imbroglio, que illes se complace denominar guerra e commercio (que es anque principal activitates del Oriente).

33

Philosophia: Strata con multe ramificationes que ab necun loco conduce al nihil.

Pica: Ave cuje disposition al furto ha facite pensar a qualcuono que on poterea inseniar lo a parlar.

Populo: In un republica, illes qui exercita le poter supreme, temperate per electiones fraudulente. Le populo es como le Simurgh, sacre ave del fabulas arabe, omnipotente a condition que illo face nihil.

Predicer: Parlar re un evento que non ha evenite, non va evenir e non evenira.

Procurator: Persona legalmente incargate de mal administrar le affaires de qualcuno qui non ha le capacitate de mal administrar los in le modo correcte.

Revelation: Famose libro in le qual le divin Sancte Johannes celava tote lo que ille sapeva. Le contento es disvelate per le commentatores, qui sape justo nihil.

Sacchear: Facer affaires sin formalismos. Appropriar se le benes de qualcuno sin observar le convenientias e le habitual precautions del latrocinio. Portar via a A le benes de B lassante C regrettar se de un occasion perditte.

Sacramento: Solemne ceremonia religiose al qual es attribuite grados diverse de autoritate e signification. Le ecclesia catholic ha septe sacramentos; le ecclesias protestante, que

ha minus medios, solo duo, e de minor sacralitate. Sectas plus parve non ha sacramentos, e iste meschin avaritia facera ganiar a illes, sin dubitas, le inferno.

Sceptro: Baston del commando de un rege, signo e symbolo de su autoritate. Originariamente illo esseva un massa del qual le soverano se serviva pro admoner le buffon de corte e pro poner su veto a decisiones ministerial, rumpente le ossos al functionario qui los proponeva.

Scriptura: Le textos sacre de nostre religion: altere cosa ab le textos false e profan sur le quales se basa tote le altere fides.

Sequace: Uno qui non ha ancora obtenite tote lo que se expecta.

35

Sin amicos: Uno qui ha nihil a dar. Infortunate. Qui dice cosas ver e de bon senso.

Sirena: Un del multe musicos-prodigio, cuje fama es ligate al van tentativa de dissuader Odysseus de passar le vita super le fluctos del oceano. In senso figurate, qualcunque femina de admirabile promissas, dissimulate intentiones e

deludente comportamento.

Societate per actiones: Astute invention pro procurar se profitos individual sin individual responsabilitates.

Trinitate: In le polyforme theismo de certe ecclesias christian, tres distincte divinitates in un. Le divinitates subordinate del polytheismo, como demones e angelos, non ha un simile facultate combinatori e lor pretensiones al culto de parte del fideles debe esser individual. Le trinitate es un del mysterios plus sublime de nostre sancte religion. Repulsante lo como incomprendibile le unitaristas revela le inadéquation de lor bases theologic. In religion, on crede solo a lo que non se comprende, excepte in casos de doctrina comprendibile que contradice un doctrina incomprendibile. In iste casos nos crede in le prime como parte integrante del secunde.

Trust: In le language politic american es un grande compania componite in grande parte per frugal laboratores, viduas con pauc medios, orphanos sub tutela de personas o de tribunales del minores, e altere malfactores e inimicos public de tal genere.

Veritate: Ingeniose mixtura de desiderabilitate e apparentia.

Le attingimento del veritate es le scopo unic del philosophia, que es le plus antique forma de occupation del mente human e ha seriose possibilitates de superviver, in modo sempre plus active, usque al fin del tempores.

Voto: Symbolo e instrumento del facultate que un homine libere ha de comportar se como un imbecille e de facer damno al proprie pais.

Vulgaritate: Le uso in relation a nos de un language critic.

Wall Street: Cava de robatores, que substitue in tote le fures fallite le sperantia del paradiso.

